



## **Saopćenje za javnost Koalicije za borbu protiv govora mržnje i zločina iz mržnje povodom napada na učesnike Međunarodnog festivala queer filma “Merlinka” u Sarajevu**

**Koalicija za borbu protiv govora mržnje i zločina iz mržnje strogo osuđuje fizički i verbalni napad na učesnike Međunarodnog festivala queer filma „Merlinka“ u Sarajevu, drugog dana održavanja festivala 01.02.2014. godine u Art kinu Kriterion u Sarajevu.**

Koalicija za borbu protiv govora mržnje i zločina iz mržnje napominje da je do fizičkog i verbalnog napada na učesnike Merlinka došlo oko 15 sati u sarajevskom kinu Kriterion od strane maskiranih napadača koji su nasrnuli na učesnike festivala, te tom prilikom troje učesnika povrijedili. S obzirom da je cilj festivala bila promocija prava i kulture LGBT osoba putem filmske umjetnosti smatramo da navedene okolnosti upućuju da se ovaj fizički napad može okvalifikovati kao zločin počinjen iz mržnje.

Nevladine organizacije - članice Koalicije za borbu protiv govora mržnje i zločina iz mržnje smatraju da je potrebno hitno preduzimanje radnji iz nadležnosti policije i tužilaštva u cilju rasvjetljavanja ovog slučaja i prevencije sličnih slučajeva u budućnosti. Podsjećamo da je nekažnjavanje govora mržnje i zločina počinjenih iz mržnje, kao krivičnih djela koje u svojoj osnovi imaju podrivanje jednakosti i ravnopravnosti građana i marginaliziranje pojedinačnih društvenih grupa, predstavljaju prijetnju miru i stabilnosti u BiH.

Članice Koalicije za borbu protiv govora mržnje i zločina iz mržnje pozivaju Ministarstvo unutrašnjih poslova i pravosudne institucije u FBiH da adekvatno reaguju, procesuiraju i osude ovakve i slične slučajeve, te profesionalnim obavljanjem svog posla sankcionišu svako krivično djelo **zločina iz mržnje i izazivanja nacionalne, rasne ili vjerske mržnje, razdora ili netrpeljivosti**. Članice Koalicije izražavaju bojazan da neosuđivanje pomenutog događaja neće doprinijeti procesu pomirenja u BiH. Ovim putem javno pozivamo sve odgovorne na preduzimanje svih potrebnih mjera kako bi onemogućili da svako buduće nasilje i pozivanje na nasilje postanu sastavni dio javnog i društvenog života Bosne i Hercegovine.

Koalicija za borbu protiv govora mržnje i zločina iz mržnje, osnovana je u januaru 2013. godine, uz podršku OSCE-a i Civil Right Defendersa, a čine je Asocijacija za demokratske inicijative, Inicijativa mladih za ljudska prava, Mediacentar Sarajevo, Sarajevski otvoreni centar, BH novinari, Vijeće za štampu u Bosni i Hercegovini, Helsinški komitet za ljudska prava u BiH. Glavni cilj formiranja Koalicije jeste zagovaranje za adekvatnu regulaciju govora mržnje i zločina iz mržnje u krivičnom zakonodavstvu oba entiteta i Brčko distrikta Bosne i Hercegovine, te harmonizaciju krivičnog zakonodavstva.

**Koalicija za borbu protiv govora mržnje i zločina iz mržnje**